



Ўзбекистон Республикаси Президентининг ФАРМОНИ

ЎЗБЕКИСТОН РЕСПУБЛИКАСИ ИЧКИ ИШЛАР ИДОРАЛАРИ ХОДИМЛАРИ КУНИ МУНОСАБАТИ БИЛАН БИР ГУРУҲ ХОДИМЛАРНИ МУКОФОТЛАШ ТЎҒРИСИДА

Мамлакатимизда жамоат хавфсизлиги, тинчлик ва барқарорликни таъминлаш борасидаги кўп йиллик фидокорона меҳнати, хизмат бурчини бажариш ва миллий манфаатларимизни ҳимоя қилишда мардлик ва жасорат кўрсатгани ҳамда ёш авлодни она-Ватанга садоқат руҳида тарбиялашга қўшган муносиб ҳиссаси учун қуйидагилар мукофотлансин:

«МЕХНАТ ШУХРАТИ» ОРДЕНИ БИЛАН

Тажибаев Валерий Викторович — Ўзбекистон Республикаси Ички ишлар вазирлиги алоҳида вазибалари бажарувчи сафарбар отрядлари фаолиятини мувофиқлаштириш бўлими бошлиғи

II ДАРАЖАЛИ «ШОН-ШАРАФ» ОРДЕНИ БИЛАН

Ражапов Бахтиёр Рузметбоевич — Ўзбекистон Республикаси Ички ишлар вазирлиги Жиноят қидирув ва терроризмга қарши курашиш бош бошқармаси бошқарма бошлиғининг ўринбосари

Яхшилик Лочинбек Яхшиликovich — Самарқанд вилояти Ички ишлар бошқармаси жиноят қидирув ва терроризмга қарши курашиш бошқармаси бўлим бошлиғи

«ДЎСТЛИК» ОРДЕНИ БИЛАН

Азизов Руслан Минилевич — Ўзбекистон Республикаси Ички ишлар вазирлиги Тошкент олий ҳарбий-техника билим юрти кафедра бошлиғи

Диров Александр Юрьевич — Ўзбекистон Республикаси Ички ишлар вазирлиги Академияси кафедра катта ўқитувчиси

Курбанбаева Умид Турсинбаевна — Қорақалпоғистон Республикаси Ички ишлар вазирлиги жиноят қидирув ва терроризмга қарши курашиш бошқармаси бўлим бошлиғининг ўринбосари

Нуриддинов Жамолiddин Пахритдинович — Ўзбекистон Республикаси Ички ишлар вазирлиги Жазони ижро этиш бош бошқармаси республика шифохонаси бошлиғи

«МАРДЛИК» ОРДЕНИ БИЛАН

Абдурашидов Шахзод Абдурашидов ўғли — Тошкент вилояти Бўстонлиқ тумани ички ишлар бўлими жиноят қидирув ва уюшган жиноятчиликка қарши курашиш бўлими катта тезкор вакили

Ахмедов Бекзод Бухорович — Қашқадарё вилояти Шахрисабз тумани ички ишлар бўлими профилактика катта инспектори

Дустмуродов Фахриддин Пардаевич — Сирдарё вилояти Ички ишлар бошқармаси ёнги хавфсизлиги бошқармаси ҳарбийлаштирилган ёнги хавфсизлиги қисми бўлинма командири

Жўраев Акмалжон Хайдаралиевич — Андижон вилояти Олтинкўл тумани ички ишлар бўлими канцелярияси катта иш юритувчиси

Олимбеков Фарход Суюнбаевич — Тошкент шаҳар Ички ишлар бошқармаси алоҳида вазибалари бажарувчи сафарбар отряди катта мутахассиси

Нажимов Одил Зайнуddинович — Навоий вилояти Ички ишлар бошқармаси ёнги хавфсизлиги бошқармаси ҳарбийлаштирилган ёнги хавфсизлиги қисми бўлинма командири

Турсунов Муроджон Ғайратович — Фарғона вилояти Ички ишлар бошқармаси алоҳида вазибалари бажарувчи сафарбар отряди катта мутахассиси

«ЖАСОРАТ» МЕДАЛИ БИЛАН

Дадабоев Илхомжон Абдуқоххорович — Андижон шаҳар Ички ишлар бошқармаси ҳарбийлаштирилган ёнги хавфсизлиги қисми катта ёнги ўқитувчиси

Жумаев Ўқтамжон Бешимович — Бухоро шаҳар ички ишлар бошқармаси бошлиғининг биринчи ўринбосари

Курбанбаев Шухрат Сафарбоевич — Хоразм вилояти Ички ишлар бошқармаси жиноят қидирув ва терроризмга қарши курашиш бошқармаси бўлим бошлиғининг ўринбосари

Ўзбекистон Республикаси Президенти
вазифасини бажарувчи

Тошкент шаҳри,
2016 йил 24 октябрь

Ш.МИРЗИЁЕВ

Ўзбекистон Республикаси Президентининг ҚАРОРИ

2017-2021 ЙИЛЛАРДА ҚИШЛОҚ ЖОЙЛАРДА ЯНГИЛАНГАН НАМУНАВИЙ ЛОЙИҲАЛАР БЎЙИЧА АРЗОН УЙ-ЖОЙЛАР ҚУРИШ ДАСТУРИ ТЎҒРИСИДА

Кейинги йилларда қишлоқ жойларда аҳоли учун намунавий лойиҳалар асосида яқка тартибдаги уй-жойлар қуриш бўйича кенг қўлланма ишлар амалга оширилганлиги қайд этилсин. Фақат 2009-2016 йиллар даврида қишлоқ жойларда 1308 турар жой массивида умумий майдони 9 573 минг квадрат метр бўлган 69 557 та шинам уй-жой қурилди. Қишлоқлардаги 83,5 мингдан ортиқ оиланинг яшаш шароити яхшиланди.

Қурилган чора-тадбирлар оилаларни замонавий, сифатли, шинам уй-жой билан таъминлашга, қишлоқда янги муҳандислик-коммуникация, ижтимоий ва бозор инфра-тузилмасини шакллантиришга қўмаклашди, қишлоқнинг қиёфасини янги даражага кўтариш ва шу асосда қишлоқ аҳолисининг ҳаёт даражасини яхшилаш ва дунёқарабини ўзгартириш имконини берди.

Шу билан бирга, ушбу соҳани ўрганиш аҳолининг реал эҳтиёжлари ва ҳарид қобилиятини, шунингдек, миллий менталитетни ва қишлоқ жойларда яшаш шароитларининг хусусиятларини тўлиқ ҳисобга олиб қурилиш самарадорлигини оширишга йўналтирилган принципал жиҳатдан янги ёндашувларни ишлаб чиқиш зарурлигини кўрсатди.

Қишлоқ жойларда аҳолининг кенг қатламларини замонавий ва шинам уй-жой билан таъминлаш даражасини тубдан ошириш мақсадига:

1. Қуйидагилар қишлоқ жойларда уй-жой қурилишини янада ривожлантиришнинг асосий йўналишлари этиб белгилансин:

яшаш учун ижтимоий-маиший шарт-шароитларни яхшилаш, қишлоқ аҳолисининг замонавий, сифатли, шинам, арзон уй-жойга бўлган эҳтиёжларини қондириш;

қишлоқ жойларда уй-жойлар қуриш учун ажратилган турар жой массивларида муҳандислик-коммуникация инфра-тузилмасини ва транспорт тармоқларини биргаликда ривожлантириш;

конструктив ва архитектура-режалаштириш ечимларини оптималлаштириш ҳисобига лойиҳа-қидирув ва қурилиш-монтаж ишлари, шунингдек, барпо этилаётган уйлар таннаҳини пасайтириш; энергияни тежайдиган материаллар ва асбоб-ускуналарнинг янги турларидан фойдаланишни кенгайтириш;

жойларда қурилиш индустриясини ривожлантириш, пудрат ташкилотларининг қувватларини кўпайтириш, уларнинг моддий-техника базасини мустаҳкамлаш;

уй-жой қурилиши учун ажратиладиган ер ресурсларидан оқилона фойдаланишни таъминлаш;

қишлоқ жойларда яқка тартибда уй-жой қурилиши учун имтиёзли кредитлар беришнинг фўқаролар учун янада қулай шартларини жорий этиш.

2. Қишлоқ жойларда мавжуд намунавий лойиҳаларга қўшимча равишда арзон уйларнинг қуйидаги янги намуналарини (кейинги ўринларда уйлар деб аталади) жорий этиш мақсадига мувофиқ деб ҳисоблансин:

хўжалик иморатлари ва обод ҳовли-

лари бўлган икки, уч қаватли кўп қаватли (2, 3 хонали) уйлар;

аҳоли зич жойлашган туманларда ҳовлидаги иморатлар билан биргаликда майдони 0,02 гектар бўлган ер участкаларида жойлаштириладиган бир қаватли 2 ва 3 хонали уйлар;

ҳовлидаги иморатлар билан биргаликда майдони 0,04 гектар бўлган ер участкаларида жойлаштириладиган икки қаватли 4 хонали бирлаштирилган уйлар.

3. Белгилансинки, уй-жойларнинг янги намуналарини қуриш учун «Қишлоқ қурилиш банк» АТБ, Ташқи иқтисодий фаолият миллий банки, «Ипотека банк» АТБ, «Халқ банки» АТБ, «Асака банк» АТБ ва «Ўзсаноатқурилишбанк» АТБ (кейинги ўринларда иштирок этувчи тижорат банклари деб аталади) уй қурувчиларга 3 йиллик имтиёзли давр ва биринчи 5 йил мобайнида йиллик 7 фоиз миқдоридаги фоиз ставкаси билан ва кейинги даврда Ўзбекистон Республикаси Марказий банкининг қайта молиялаштириш ставкаси миқдорида 15 йил муддатга ипотека кредитлари берадилар, бунда уй қурувчиларнинг дастлабки бадалли қуйидаги миқдорларни ташкил этади:

15 фоиз — икки, уч қаватли кўп қаватли (2 ва 3 хонали) уйлар ва 2, 3 хонали бир қаватли уйлар учун;

25 фоиз — икки қаватли 4 хонали бирлаштирилган уйлар учун.

► Давоми 2-бетда.

САЙЛОВ — 2016


САЙЛОВ ВА ХОТИН-ҚИЗЛАР

Ўзбекистон Республикаси Президенти сайловини ёритиш бўйича Республика матбуот марказида Ўзбекистон Хотин-қизлар қўмитаси сайлов комиссияси билан ҳамкорликда хотин-қизларнинг сайловлардаги иштирокига бағишланган республика семинари ўтказилди.

Видеоконференцалоқа шаклида ташкил этилган тадбирда Хотин-қизлар қўмитаси ва унинг жойлардаги ҳудудий тузилмалари, Марказий сайлов комиссияси, Ўзбекистон Республикаси Президенти ҳузуридаги Давлат бошқаруви академияси, Фўқаролик жамияти шаклланишини мониторинг қилиш мустақил институти, «Олима аёл» уюшмаси, «Оила» илмий-амалий маркази, «Маҳалла» хайрия жамоат фонди масъул ходимлари, бошланғич хотин-қизлар ташкилотлари раислари, фўқаролар йиғинларининг диний маърифат ва маънавий-ахлоқий тарбия масалалари бўйича масъулачилари, оммавий ахборот воситалари вакиллари қатнашди.

Бугунги кунда Ўзбекистон Республикаси Конституцияси, 80 дан ортиқ қонун ва бошқа норматив-ҳуқуқий ҳужжатлар хотин-қизларнинг ҳуқуқлари ва қонуний манфаатларини таъминлашга хизмат қилмоқда. Асосий қонунимизнинг 46-моддасида аёллар ва эркакларнинг тенг ҳуқуқли эканлиги белгилаб қўйилган.

Тадбирда Марказий сайлов комиссияси томонидан 2016 йил 7 октябрда тасдиқланган Ўзбекистон Республикаси Президентини сайловига тайёргарлик қилиш даврида сайловчилар ҳуқуқий маданиятини янада юксалтириш



Фаруқ АЛИЕВ олган сурат.

бўйича ўтказилган тадбирлар дастури ижросини таъминлаш, жумладан, аҳолининг истиқлол йилларида яратилган миллий сайлов тизими тўғрисидаги билим ва кўникмаларини янада оширишга қаратилган кенг тушунтириш ишлари олиб борилаётганлиги қайд этилди.

Семинарда Президент сайловида тайёргарлик қилиш ва уни ўтказиш бўйича амалга ошириладиган тадбирларда хотин-қизлар қўмиталари, уларнинг бошланғич ташкилотлари ва фўқаролар йиғинларидаги хотин-қизлар билан ишлаш комиссияларининг ўрни, «Ўзбекистон Республикаси Президенти сайлови тўғрисида»ги қонуннинг аҳамияти, округ ва участка сайлов комиссияларининг асосий вазифалари, улар ишида хотин-қизларнинг иштироки, сайловни ташкил этиш ва ўтказиш жараёнида фўқаролик жамияти институтларининг роли каби масалалар ҳақида сўз юритилди.

Тадбирда Ўзбекистон Республикаси Бош вазирининг ўринбосари, Республика Хотин-қизлар қўмитаси раиси Э.Боситхонова сўзга чиқди.

Н.УСМОНОВА,
ЎЗА мухбири.

ЁШЛАР БИЛАН УЧРАШУВ

Ўзбекистон Республикаси Президенти сайловини ўтказувчи 7-Самарқанд округ сайлов комиссияси матбуот марказида ёшлар билан учрашув бўлиб ўтди.

Самарқанд шаҳридаги ўрта махсус, касб-хунара таълими муассасалари ўқувчилари, бу йил биринчи мартаба овоз берадиган ёшлар иштирок этган тадбирда округ сайлов комиссияси аъзолари жорий йилнинг 4 декабрь куни ўтказилган Ўзбекистон Республикаси Президенти сайловига қўйилаётган тайёргарлик, сайловнинг ҳуқуқий асослари ва қонунларда белгиланган қоидалар, фўқаролар сайлов ҳуқуқларининг кафолатлари ҳақида сўз юритилди.

Конституциямизда Ўзбекистон Республикаси фўқаролари давлат ҳокимияти вакиллик органларига сайлаш ва сайланиш ҳуқуқига эга экани белгилаб қўйилган. Овоз бериш ҳуқуқи, ўз хоши-иродасини билдириш тенглиги ва эркинлиги қонун билан кафолатланган. Ана шу қоида асосида «Ўзбекистон Республикаси Президенти сайлови тўғрисида»ги қонунда 18 ёшга тўлган ёшларнинг Ўзбекистон Республикаси Президенти сайловида қатнашиш ҳуқуқи қайд этилган. Ижтимоий келиб чиқиши, ижтимоий ва мулкӣ аҳолига, ирқий ёки миллий мансублигига, жинси, маълумоти, тили, динига муносабатига, машғулоти тури ва ҳусусиятига қараб Ўзбекистон Республикаси фўқароларининг сайлов ҳуқуқини бирон-бир тарзда бевоқифа ёки билвосита чеклаш тақиқланади.

Учрашувда вилоятда 1030 участка сайлов комиссияси фаолият олиб бораётгани, улар томонидан сайловчилар рўйхати шакллантирилаётгани, овоз беришнинг яширинлиги, ҳар бир сайловчи ўзи истagan номзодга овоз бериш ҳуқуқига эга экани тушунтирилди.

Учрашувда комиссия аъзолари ёшларни қизиқтирган саволларга атрофлича жавоб қайтарди.

Ғ.ҲАСАНОВ,
ЎЗА мухбири.

ПРЕЗИДЕНТ ҚАРОРИ

■ Янгиланган лойиҳалар бўйича барпо этиладиган уйлар ўзининг нарх параметрлари, сифат тавсифлари ва шинамлилиги бўйича Марказий Осиёда ўхшаши йўқлигини эътироф этиш зарур.

Ўзбекистон Республикаси Президентининг ҚАРОРИ

2017-2021 йилларда қишлоқ жойларда янгиланган НАМУНАВИЙ ЛОЙИҲАЛАР БЎЙИЧА АРЗОН УЙ-ЖОЙЛАР ҚУРИШ ДАСТУРИ ТЎҒРИСИДА

4. Ўзбекистон Республикаси Иқтисодиёт вазирлиги, Молия вазирлиги, Давлат архитектура ва қурилиш қўмитаси томонидан Қорақалпоғистон Республикаси Вазирлар Кенгаши, вилоятлар ҳокимликлари, «Қишлоқ қурилиш инвест» ИК МЧЖ, иштирок этувчи тижорат банклари ва бошқа манфаатдор идоралар билан биргаликда ишлаб чиқилган 2017 йилда қишлоқ жойларда намунавий лойиҳалар бўйича арзон уй-жойлар қуриш дастури (кейинги ўринларда Дастур деб аталади) маъқуллансин. Дастур қўйидагиларни ўз ичига олади:

2017 йилда намунавий лойиҳаларнинг аниқ турлари бўйича қишлоқ жойларда умумий молиялаштириш ҳажмлари 2 121,5 миллиард сўм бўлган 15,0 мингта арзон, замонавий, шинам уй-жойлар, шу жумладан биринчи тури бўйича — 4 608 та, иккинчи тури бўйича — 3 739 та, учинчи тури бўйича — 3 672 та, қуришнинг йиғма ва асосий параметрлари 1-5-иловага мувофиқ;

2017 йилда турар жой массивлари учун муҳандислик-транспорт коммуникациялари ва инфратузилма объектилари қуриш бўйича йиғма кўрсаткичлар 6-иловага мувофиқ.

5. Қорақалпоғистон Республикаси Вазирлар Кенгаши Раисига, вилоятлар ҳокимларига, Ўзбекистон Республикаси Иқтисодиёт вазирлиги, Молия вазирлиги, Давлат архитектура ва қурилиш қўмитаси, Молия вазирлиги ҳузуридаги Республика йўл жамғармаси, «Қишлоқ қурилиш инвест» ИК МЧЖ, «Қишлоқ қурилиш лойиҳа» МЧЖ, «Ўзбекэнерго» АЖ, «Ўзтрансгаз» АЖ, иштирок этувчи тижорат банклари, бошқа манфаатдор вазирликлар ва идоралар раҳбарларига:

маъқулланган Дастур параметрларига мувофиқ уйлар, муҳандислик-транспорт коммуникациялари, ижтимоий ва бозор инфратузилмаси объектилари қуриш;

қурилиш-монтаж ишлари таннаҳини пасайтиришга, маҳаллий қурилиш индустриясини

барқарор ва мутаносиб ривожлантиришга, пудрат ташкилотларининг салоҳиятини мустаҳкамлашга йўналтирилган чоратadbирларни изчил амалга ошириш юзасидан шахсий масъулият юклансин.

6. Ўзбекистон Республикаси Молия вазирлиги: иштирок этувчи тижорат банкларининг буюртманомалари бўйича иштирок этувчи тижорат банкларининг маржаси йилга 4 фоиз миқдорда бўлишини ҳисобга олган ҳолда йилга 3 фоизли ставка бўйича 5 йиллик имтиёзли даврни ўз ичига олувчи 15 йил муддатга миллий валютада кредит линиялари очсин, бунда кредит линияси маблағларини Дастур доирасида уйлар қуришга мақсадли йўналтирсин;

Ўзбекистон Республикаси Иқтисодиёт вазирлиги, Ташқи иқтисодий алоқалар, инвестициялар ва савдо вазирлиги, Марказий банк ва иштирок этувчи тижорат банклари билан биргаликда Дастурни амалга оширишга халқаро молия институтлари ва хорижий ҳукуматларнинг молиялаштирувчи ташкилотларининг имтиёзли узоқ муддатли кредитларини жалб этиш масаласини ишлаб чиқсин.

7. Ўзбекистон Республикаси Иқтисодиёт вазирлиги:

Қорақалпоғистон Республикаси Вазирлар Кенгаши, вилоятлар ҳокимликлари, Ўзбекистон Республикаси Давлат архитектура ва қурилиш қўмитаси, иштирок этувчи тижорат банклари ва Вазирлар Маҳкамаси ҳузуридаги Ижтимоий тадқиқотлар институти билан биргаликда қишлоқ аҳолисининг уй-жойларнинг ҳар бир намунасига бўлган талабни ўрганиш натижаларидан келиб чиқиб, 2017 йил 1 апрелгача бўлган муддатда Вазирлар Маҳкамасига кейинги йилларда қишлоқ жойларда намунавий лойиҳалар бўйича арзон уй-жойлар қуриш дастурини амалга ошириш параметрлари юзасидан таклифлар киритсин; Ўзбекистон Республикаси Молия вазирлиги, Марказий банк ва Ташқи иқтисодий алоқалар, инвестициялар ва савдо

вазирлиги билан биргаликда 2018-2021 йилларда қишлоқ жойларда намунавий лойиҳалар бўйича арзон уй-жойлар қуриш дастури молиялаштириш миқдорлари ва манбааларини белгиласин, шу жумладан халқаро молия институтлари ва хорижий ҳукуматларнинг молиялаштирувчи ташкилотларининг кредит маблағларини жалб этишни назарда тутсин.

8. Қорақалпоғистон Республикаси Вазирлар Кенгаши ва вилоятлар ҳокимликлари келгуси йилга қишлоқ жойларда намунавий лойиҳалар бўйича арзон уй-жойлар қуриш дастури доирасида ҳар йили белгиланган тартибда:

1 майгача — Ўзбекистон Республикаси Ер ресурслари, геодезия, картография ва давлат кадастри давлат қўмитаси ҳамда Давлат архитектура ва қурилиш қўмитаси билан келишган ҳолда, кейинчалик уйлар, муҳандислик-транспорт коммуникациялари ва ижтимоий ва бозор инфратузилмаси объектилари қуриш учун «Қишлоқ қурилиш инвест» ИК МЧЖга бериладиган, қишлоқ хўжалиги мақсадидagi ерлар тоифасига ва ўрмон фондига кирмайдиган, ташқи муҳандислик коммуникацияларига уланадиган массивлар рўйхати тасдиқлаш учун Вазирлар Маҳкамасига киритилишини;

1 сентябргача — иштирок этувчи тижорат банклари билан биргаликда талабгорлар аниқлишини ва уйлар қуриш учун уларнинг дастлабки бадаллари шакллантирилишини;

1 октябргача — «Қишлоқ қурилиш инвест» ИК МЧЖ ва Ўзбекистон Республикаси Давлат архитектура ва қурилиш қўмитаси билан биргаликда фойдаланишга тайёр ҳолда топшириш шартларида уйлар қуриш учун Қурилиш-пудрат ташкилотлари реестрига киритилган пудрат ташкилотларини аниқлаш бўйича танлов савдолари ўтказилишини;

1 ноябргача — «Ўзбекэнерго» АЖ, «Ўзтрансгаз» АЖ, Республика йўл жамғармаси ва «Қишлоқ қурилиш инвест» ИК МЧЖ билан биргаликда янги-дан қуриладиган қишлоқ турар

жой массивларида муҳандислик-транспорт коммуникациялари ва инфратузилма объектилари қуриш учун Қурилиш-пудрат ташкилотлари реестрига киритилган пудрат ташкилотларини аниқлаш бўйича танлов савдолари ўтказилишини таъминласинлар.

9. «Қишлоқ қурилиш инвест» ИК МЧЖ қишлоқ жойларда намунавий лойиҳалар бўйича арзон уй-жойлар қуриш жой массивларида сув, электр, газ таъминоти объектилари ва автомобиль йўллари қуриш тегишли равишда республика бюджетини, «Ўзбекэнерго» АЖ, «Ўзтрансгаз» АЖ ва Республика йўл жамғармаси маблағлари ҳисобига амалга оширилади.

10. Белгилансинки, турар жой массивларида сув, электр, газ таъминоти объектилари ва автомобиль йўллари қуриш тегишли равишда республика бюджетини, «Ўзбекэнерго» АЖ, «Ўзтрансгаз» АЖ ва Республика йўл жамғармаси маблағлари ҳисобига амалга оширилади.

11. «Қишлоқ қурилиш банк» АТБ Ўзбекистон Республикаси Иқтисодиёт вазирлиги, Молия вазирлиги, Адлия вазирлиги, иштирок этувчи тижорат банклари ва «Қишлоқ қурилиш инвест» ИК МЧЖ билан биргаликда фуқароларнинг ўзини ўзи бошқариш органларининг тавсиялари асосида, ариза берувчи — уй қурувчининг Дастурдаги иштироки тартиби тўғрисидаги низоом лойиҳасини бир ой муддатда тасдиқлаш учун Ўзбекистон Республикаси Вазирлар Маҳкамасига киритсин.

12. 2017-2021 йилларда қишлоқ жойларда намунавий лойиҳалар бўйича арзон уй-жойлар қуриш дастури доирасида 2022 йил 1 январгача: пудрат ташкилотлари — «Қишлоқ қурилиш инвест» ИК МЧЖ билан тузилган шартномалар бўйича фойдаланишга тайёр ҳолда топшириш шартларида массивларда уйлар, сув таъминоти объектилари ва автомобиль йўллари қуриш бўйича ишлар ҳажмлари учун — солиқларнинг барча турларини ва давлат мақсадли жамғармаларига мажбурий ажратмалар тўлашдан;

субпудрат ташкилотлари — массивларда уйлар, сув таъминоти объектилари ва автомобиль

йўллари қуришга «Қишлоқ қурилиш инвест» ИК МЧЖ билан шартномалар тузган бош пудрат ташкилотлари билан тузилган контрактлар бўйича улар томонидан бажариладиган ишлар ҳажмлари учун — ягона солиқ тўлови тўлашдан; қурилиш материаллари ва асбоб-ускуналар ишлаб чиқарувчи ташкилотлар, шунингдек, уларни ташийдиган ташкилотлар — фойдаланишга тайёр ҳолда топшириш шартларида уйлар қуриш учун «Қишлоқ қурилиш инвест» ИК МЧЖга ва «Қишлоқ қурилиш инвест» ИК МЧЖ билан шартномалар тузган бош пудрат ташкилотларида қурилиш материаллари ва асбоб-ускуналарни реализация қилиш ва уларни ташиш (жумладан импорт материалларини) ҳажмлари учун қўшилган қиймат солиғи, ягона солиқ тўлови ва давлат мақсадли жамғармаларига мажбурий ажратмалар тўлашдан;

«Қишлоқ қурилиш инвест» ИК МЧЖ — солиқларнинг барча турларини ва давлат мақсадли жамғармаларига мажбурий ажратмалар тўлашдан; «Қишлоқ қурилиш лойиҳа» МЧЖ — «Қишлоқ қурилиш инвест» ИК МЧЖ билан тузилган шартномалар бўйича уйлар, муҳандислик-транспорт коммуникациялари ва инфратузилма объектилари қуриш бўйича бажарилган лойиҳа-қидирув ишлари ҳажмлари учун — қўшилган қиймат солиғи тўлашдан;

«Ўзсаноатэкспорт» АЖ — 7-иловага мувофиқ республикада ишлаб қуриладиган, четдан олиб келинадиган ёғоч-тахта материаллари, томга ёпиладиган металл листлар учун божхона тўловларидан (божхона расмийлаштириш йиғимлари бундан мустасно), шунингдек, Вазирлар Маҳкамаси томонидан тасдиқланмайдиган рўйхат бўйича бошқа қурилиш материаллари учун, улар «Қишлоқ қурилиш инвест» ИК МЧЖга сотилганда — қўшилган қиймат солиғи тўлашдан;

«Тошкент қишлоқ қурилиш сервис» МЧЖ ва транспорт корхоналари — металл листларни қайта ишлаш ва уларни «Қишлоқ қурилиш инвест» ИК МЧЖга етказиб бериш

бўйича ишлар ҳажмлари учун — қўшилган қиймат солиғи, ягона солиқ тўлови ва давлат мақсадли жамғармаларига мажбурий ажратмалар тўлашдан озод этилсин.

Ўзбекистон Республикаси Давлат солиқ қўмитаси ушбу қарорда назарда тутилган солиқ ва божхона имтиёзларидан тўғри фойдаланилиши устидан қатъий назорат ўрнатсин.

13. Қўйидагиларга истисно тариқасида:

2017 йил 1 мартгача бўлган муддатда — 2, 3 ва 4-илова-ларда кўрсатилган уйларнинг қурилиш-монтаж ишларини лойиҳа-смета ҳужжатларини ишлаб чиқиш билан бир вақтда амалга оширишга; 2017 йил 1 январгача фойдаланишга топшириш юзасидан зарур чоралар қўрилган ҳолда 0,02 гектар майдондаги ер участкаларига жойлаштирил-диган 26 та икки, уч қаватли кўп квартиралли (2 ва 3 хонали) уйларни ва 130 та бир қаватли 2, 3 хонали уйларни жорий йилда қуришни бошлашга;

8-иловага мувофиқ рўйхат бўйича уйлар қуриш учун бош пудрат ташкилотларига марказлаштирилган тартибда етказиб бериладиган асосий қурилиш материаллари ва асбоб-ускуналарнинг «Қишлоқ қурилиш инвест» ИК МЧЖ томонидан тендер савдолари ўтказилмасдан энг мақбул таклифлар танлови орқали сотиб олинishiга рухсат берилсин.

14. Ўзбекистон Республикаси Иқтисодиёт вазирлиги, «Ўзу-ришматериаллари» АЖ ва «Ўзметкомбинат» АЖ буюртмачи ва лойиҳалаш ташкилотининг асосланган ҳисоб-китоблари бўйича ушбу қарор билан тасдиқланган Дастур доирасида уйлар, муҳандислик-транспорт коммуникациялари ва ижтимоий инфратузилма объектилари учун тартибга солинадиган нархлар бўйича цемент ва металл прокати ажратилишини таъминласинлар.

Ўзбекистон Республикаси Президенти
вазифасини бажарувчи

Ш.МИРЗИЁЕВ

Тошкент шаҳри,
2016 йил 24 октябрь

Ўзбекистон Республикаси Президентининг «2017-2021 йилларда қишлоқ жойларда янгиланган намунавий лойиҳалар бўйича арзон уй-жойлар қуриш дастури тўғрисида»ги қарорига ШАРҲ

Кейинги йилларда республикада қишлоқ аҳоли пунктларининг меъморий қиёфасини яхшилаш, намунавий лойиҳалар бўйича яқка тартибда уй-жойлар қуриш ҳисобига қишлоқ аҳолисининг ҳаёти даражаси ва сифатини ошириш, қишлоқда муҳандислик ва транспорт коммуникацияларини, ижтимоий инфратузилма объектиларини жадал ривожлантириш бўйича кўламли ишлар амалга оширилди. Фақат 2009-2016 йилларда қишлоқ жойларда 1308 турар жой массивида умумий майдони 9 миллион 573 минг квадрат метр бўлган 69 557 та шинам уй-жой қурилди. Қишлоқлардаги 83,5 мингдан ортиқ оиланинг яшаш шароити яхшиланди.

Шу билан бирга, ўрганиш якунлари аҳолининг реал эҳтиёжларини ва харид қобилиятини, шунингдек, миллий менталитетни ва қишлоқ жойларда яшаш шароитларини тўлиқ ҳисобга олувчи қурилишнинг юқори самардорлигини таъминлайдиган принципал жиҳатдан янги ёндашувларни ишлаб чиқиш зарурлигини кўрсатди.

Қишлоқ аҳолисининг замонавий ва арзон уйларга бўлган ўсиб бораётган эҳтиёжи имтиёзли кредит беришининг юқори даражадаги шартларини жорий этишни, энергия тежайдиган материаллар ва асбоб-ускуналарнинг янги турларидан фойдаланишни янада кенгайтиришни, шунингдек, барпо этилаётган

уйларнинг таннаҳини пасайтириш-ни талаб қилмоқда.

Ушбу муҳим вазифалар ҳисобга олинган ҳолда қабул қилинган қарор қишлоқ аҳолисининг кенг қатламлари учун замонавий ва шинам уйлардан фойдаланиш даражасини тубдан оширишга, ер ресурсларидан оқилона фойдаланишни таъминлашга ва қишлоқ жойларда яқка тартибда уй-жой қурилишини янада ривожлантиришга йўналтирилган.

Қарор тўпланган тажрибани ўрганиш ҳисобга олиб, қишлоқ жойларда яқка тартибда уй-жой қурилишига янгича ёндашуви мустаҳкамланди. Қарорда беш йиллик даврга мўлжалланган қишлоқ жойларда арзон уйлар қуришнинг кўламли Дастурини амалга ошириш назарда тутилган. Дастурга асос қилиб олинган янги-ланган намунавий лойиҳалар қишлоқ аҳолисининг юқорида кўрсатиб ўтилган талаблари ва эҳтиёжларини тўлиқ ҳисобга олади, чунки уларнинг фикр-лари ва истак-хоҳишлари ҳисобга олиниб ишлаб чиқилган.

Дастурда қишлоқ жойларда нарх параметрлари ва шинамлилигига кўра яқка тартибдаги уй-жойлар намуналарининг ўрта энг арзон турларини қўшимча равишда барпо этиш назарда тутилди.

Жумладан, биринчи тури бўйича уч ёки тўрт йўлак, ҳўжалик иморатлари ва обод ҳўвлилари бўлган

икки ва уч қаватли кўп квартиралли уйлар барпо этишни назарда тутди. Мисол учун бундай уйларда умумий майдони 42,4 квадрат метр ва тахминий қиймати 72,5 миллион сўм, ҳўжалик иморатлари ҳисобга олинган ҳолда 85,0 миллион сўм бўлган икки хонали квартиралар қуриш режалаштирилмоқда.

Ўз навбатида, уч хонали квартираларнинг майдони 52,4 квадрат метр ва тахминий қиймати 88,5 миллион сўм, ҳўжалик иморатлари ҳисобга олинган ҳолда 100,7 миллион сўм бўлади.

Бундан ташқари, қўрсатиб ўтилган кўп квартиралли уйларни қуришда квартиралар эгаларининг эҳтиёжларини қондириш мақсадида ҳовлида жойлаштирилмайдиган иморатлар — бо-лалар майдончалари, дам олиш учун айвонлар, душ ва бошқалар барпо этиш назарда тутилди.

Иккинчи турига мувофиқ аҳоли зич жойлашган туманларда 2 сотих майдондаги ер участкасида барпо этила-диган бир қаватли икки ва уч хонали арзон уйлар қуриш мўлжалланмоқда. Бундай икки хонали уйларнинг умумий майдони 53,0 квадрат метр ва тахминий қиймати 93,8 миллион сўм, ҳўжалик иморатлари ҳисобга олинган ҳолда 101,5 миллион сўм бўлади.

Уч хонали уйларнинг умумий май-дони 63,5 квадрат метр ва тахминий қиймати 111,0 миллион сўм, ҳўжалик иморатлари ҳисобга олинган ҳолда

118,7 миллион сўм бўлади. Уйлар-нинг ҳўвлисига ҳўжалик иморатлари қуриш назарда тутилди.

Учинчи тури 4 сотих майдондаги ер участкасида барпо этиладиган умумий майдони 115,0 квадрат метр бўлган ягона блокка бирлаштирилган икки қаватли тўрт хонали уйлар қуришни назарда тутди. Бунда кўрсатиб ўтилган уйларнинг тахминий қий-мати 162,0 миллион сўмин, ҳўжалик иморатлари ҳисобга олинган ҳолда 181,8 миллион сўмини ташкил этади. Уйларнинг ҳўвлисига ҳўжалик иморат-лари қуриш назарда тутилди.

Агар 2009 йилда қабул қилинган Қишлоқ жойларда намунавий лойи-ҳалар бўйича яқка тартибда уй-жой-лар қуриш дастури доирасида уй қурувчининг дастлабки бадалли 25 фоизни ташкил этган бўлса, янги Дастур бўйича ушбу бадал биринчи ва иккинчи турдаги уйларни қурувчи-лар учун атиги 15 фоизни ташкил эта-ди. Бу арзон уйлар Дастурига қишлоқ аҳолисининг кенг қатламларини жалб этишга кўмаклашади.

Бундан ташқари, ипотека кредити уч йиллик имтиёзли давр ва биринчи 5 йил мобайнида йиллик 7 фоиз миқдо-ридаги фоиз ставкаси билан 15 йил муддатда берилди. Кейинги йилларда кредитнинг фоиз ставкаси Марказий банкнинг ҳўзирги вақтда йиллик 9 фо-изни ташкил этадиган қайта молияла-штириш ставкасидан ортиқ бўлмайд.

Дастурни молиялаштиришга фа-қат 2017 йилда 2 триллион 121,5 мил-лиард сўм йўналтирилади, шу жум-ладан уй қурувчиларнинг маблағла-ри билан биргаликда давлат бюдже-тидан 350,0 миллиард сўм ажрати-лади, шунингдек, тижорат банклари-нинг 2 триллион сўмдан ортиқ миқ-доридagi кредит ресурсларини жалб этиш назарда тутилди.

Умуман олганда, Дастурда 2017 йилда 15 мингта янги уй ва кварти-ра, шу жумладан 4608 та биринчи тур-даги, 3739 та иккинчи турдаги, 3672 та учинчи турдаги уйларни ҳамда 0,06 гектар майдонга 3, 4 ва 5 хонали 2981 та бир қаватли уй қуриш назар-да тутилди.

Шу билан бирга, янги қурилаёт-ган уй-жой массивларида фақат дав-лат ресурслари ҳисобига 415,3 кило-метр сув таъминоти тармоқлари, 291,5 километр электр таъминоти тармоқлари, 316,9 километр газ таъ-миноти тармоқлари ва 260,3 кило-метр автомобиль йўллари, шу жум-ладан массивлар ичида кириш йўлла-ри ва йўллар, шунингдек, 134 та иж-тимоий инфратузилма объектини барпо этиш мўлжалланмоқда.

Қурилиш-монтаж ишлари сифати-га қўйиладиган талабларнинг ошири-лиши Дастурнинг яна бир муҳим ҳу-сусияти ҳисобланади. Бунда асосий қурилиш материаллари ва буюмлар-га қурилиш-пудрат ташкилотларининг

15. Ўзбекистон Республи-каси Давлат архитектура ва қурилиш қўмитаси «Қишлоқ қурилиш инвест» ИК МЧЖ, «Қишлоқ қурилиш лойиҳа» МЧЖ, Қорақалпоғистон Рес-публикаси Вазирлар Кенгаши, вилоятлар ҳокимликлари би-лан биргаликда Дастурни амалга ошириш доирасида қурилиш-монтаж ишлари ба-жарилиши сифати ва лойиҳа ечимлари, шунингдек, шаҳар-созлик нормалари ва қоида-ларига риоя этилиши устидан давлат архитектура-қурилиш, техник ва муаллифлик назо-ратлари юритилишини таъмин-ласин.

16. Ўзбекистон миллий те-лерадиокомпанияси, Ўзбекис-тон Миллий ахборот агентли-ги, Ўзбекистон матбуот ва ах-борот агентлиги Қорақалпоғис-тон Республикаси Вазирлар Кенгаши, вилоятлар ҳокимлик-лари, Ўзбекистон Республика-си Давлат архитектура ва қурилиш қўмитаси, «Қишлоқ қурилиш инвест» ИК МЧЖ ва иштирок этувчи тижорат банк-лари билан биргаликда Қиш-лоқ жойларда намунавий ло-йиҳалар бўйича арзон уй-жой-лар қуриш дастурининг мар-казлаштирилган тартибда ет-казиб берилмайдиган асосий қурилиш материаллари ва ас-боб-ускуналарнинг «Қишлоқ қурилиш инвест» ИК МЧЖ то-монидан тендер савдолари ўт-казилмасдан энг мақбул так-лифлар танлови орқали сотиб олинишига рухсат берилсин.

17. «Қишлоқ қурилиш банк» АТБ, «Қишлоқ қурилиш инвест» ИК МЧЖ Ўзбекистон Респу-бликаси Молия вазирлиги, Иқтисодиёт вазирлиги ва Адлия вазирлиги билан бир-галикда бир ой муддатда Ва-зирлар Маҳкамасига қонун ҳужжатларига ушбу қарордан келиб чиқувчи ўзгариш ва қўшимчалар киритиш тўғриси-да таклиф киритсин.

18. Мазкур қарорнинг ба-жарилишини назорат қилиш Ўзбекистон Республикаси Бош вазирининг биринчи ўринбоса-ри Р.С.Азиев ва Ўзбекистон Республикаси Бош вазирининг ўринбосари Б.И.Закиров зим-масига юклансин.

◀ Давом. Бошланғич 1-бетда.

сайловга қизғин тайёргарлик кўрилмоқда

A black and white portrait of a man with dark hair, wearing a dark suit jacket, a white shirt, and a patterned tie. He is looking directly at the camera with a neutral expression. The background is a light, textured grey.

Шавкат Мамадалиев,
ЎЗХДП Марказий Кенгаши
Бошланғич ташиқлотлар
билан ишлаш сектори
мудири:



Олим Равшанов,
ЎзХДП Қашқадарё
вилоят кенгаши
раиси:

A black and white portrait of a middle-aged man with short, light-colored hair. He is wearing a dark suit jacket, a white collared shirt, and a dark tie. He has a neutral expression and is looking directly at the camera. The background is a plain, light color.

Шухрат Аҳмедов,
Чилонзор туманидаги
«Гавҳар» маҳалла фуқаролар
йигини раиси, ЎзХДП
ҳудудий ташкилоти
етакчиси:

УЧАСТКА САЙЛОВ КОМИССИЯСИ ОКРУГ САЙЛОВ КОМИССИЯСИ ТОМОНИДАН САЙЛОВГА
КАМИДА ҚИРҚ КУН ҚОЛГАНИДА 5-19 НАФАР АЪЗОДАН, ШУ ЖУМЛАДАН РАИС, РАИС
ЎРИНБОСАРИ ВА КОТИБДАН ИБОРАТ ТАРКИБДА ТУЗИЛАДИ.

МАЪНАВИЯТ

Юксак маънавияти, маданияти ва миллий урф-одатлари билан дунё тамаддунида ўз ўрнига эга миллатмиз. Шундай экан...

2016 йил —
СОҒЛОМ ОНА
ВА БОЛА ЙИЛИ

ТИББИЙ ХИЗМАТ СИФАТИ ОШМОҚДА


Навий вилоят марказидан қарийб 320 километр олисда жойлашган Учқудук туман тиббиёт бirlашмасининг 60 ўринли поликлиникаси замонавий тиббий жиҳозлар билан тўлиқ таъминланиб, аҳолига хизмат кўрсатишни бошлади.

Бундан ташқари, «Соғлом она ва бола йили» Давлат дастури ижроси доирасида «Навийқишлоққурилиш» МЧЖ томонидан вилоят асаб-руҳий касалликлар диспансерининг юз ўринли бўлими ҳамда 25 қатновли поликлиника биноси янгидан қуриб битказилди. Навий шаҳрида «Жавоҳир Навий» МЧЖ томонидан бир йўла 250 қатновли 2-оилавий поликлиника фойдаланишга топширилди. Вилоят сил касалликлари диспансерининг 120 ўринли ва 75 қатновли поликлиника биноси реконструкция қилинди.

Мамлакатимиз соғлиқни сақлаш тизимидаги кенг қўлланма ислохотлар боис, эндиликда энг олис ҳудудларда истиқомат қилаётган фуқаролар ҳам малакали тиббий хизматдан баҳраманд бўлмоқда. Вилоятда аҳоли саломатлигини муҳофаза қилиш борасидаги бундай бунёдкорлик ишлари давом этаётган.

Илҳом САТТОРОВ,
«Ўзбекистон овози» муҳбири.

ЎЗЛИГИМИЗГА ХОС БЎЛСИН



Мустақиллик туфайли юртимизда беқиёс ўзгариш ва янгиланишлар бўлди, бебаҳо қадриятларимиз тикланди. Аммо мустақиллик давридан қолган айрим жузъий асоратлар борки, улардан ҳозирга қадар тўла воз кечилмаётгани кишини ўйга толдиради.

Бундай асоратлар арзimasдек кўрингани билан одамнинг кўнглини огритади, ғурурига тегади. Масалан, ҳалихануз исмиимиз ва отамиз исми ёзилганда, «ов», «ев», «евич», «евна» каби қўшимчалар билан ҳужжат тайёрлаб берилаётганини биламиз. Бу — бошқа миллат қоидаларига тақлид қилишдир.

Яқин ўтмишда мустақил тузум таркибида бўлган Грузия, Украина, Озарбайжон, Армани-

стон, Болтиқбўйи республикалари халқлари бу масалада ўз миллий аъналаридан воз кечмаган. Биз мустақилликка эришганимизга чорак аср бўлишига қарамаздан, ҳалиханузгача бу ноқисликдан қутуллолмаётганимизни қандай изохлаш мумкин?

Биринчи Президентимиз Ислон Каримов таъкидлаганидек, биз ҳеч кимдан кам эмасмиз ва ҳеч кимдан кам бўлмаймиз. Шундай экан, ўзлигимизни

намоён этувчи насл-насабимизни миллат руҳи ва имло қоидаларига мос тарзда ёзишга жиддий аҳамият беришимиз мақсадга мувофиқ бўларди, деб ўйлайман. Тўғри, фарзандига миллатимизга хос тарзда гувоҳнома ёздирадиганлар аста-секин кўпайиб бормоқда. Бугунги ёш оилалар бу масалага эътибор билан қарашлари керак, назаримда.

Шунингдек, «фамилия» ўрнига «насаби» сўзи ёзилса яхшироқ, тўғрироқ бўлади. Фамилия — латинча сўз бўлиб, куллар, тобеълар, хонадон маъноларида келади (Ўзбек тилининг изоҳли луғати 4-жилд, 323-бет). Насаб — қонқариндошлик, алоқа, муносабат, келиб чиқиш, насл-насаб, бир ота-бободан тарқалган авлод маъноларида ишлатилади (Ўзбек тилининг изоҳли луғати, 3-жилд 20-бет).

Тарихдан сабоқ олишни, дўст ва душманнинг фарқига боришни ёшларимизга ўргатиш баробарида, уларни миллий руҳ ва қадриятларимизга муносиб авлод қилиб тарбиялаш муҳим аҳамиятга эга ва бунга алоҳида эътибор қаратишимиз лозим, деб ўйлайман.

Аҳмаджон БОБОМУРОДЗОДА,
Имом Бухорий номидаги Тошкент ислом институти катта ўқитувчиси.

РЕКЛАМА

«ЎЗМЕЛИОМАШЛИЗИНГ» ДАВЛАТ ЛИЗИНГ КОМПАНИЯСИ

КУЙИДАГИ ТЕХНИКАЛАРНИ, ЖУМЛАДАН:

Автосамосвал MAN шассисда (юк кўтариш имконияти 20-25 тонна);




Автотран MAN ва ISUZU шассисларида (юк кўтариш имконияти 16 тонна);



Енгил ташув машинаси (автомобил) ISUZU шассисда, қўшма қўшма 4 тонна;



Краноманипулятор MAN шассисда (юк кўтариш имконияти 5 тонна);



Лазерли ер текислагич (қамраб олиш кенглиги-3,5 метр).

техника кийматининг 30 фоизидан кам бўлмаган қисмини олдиндан тўлаш шарти билан узок муддатга лизинг асосида таклиф этади.

Лизинг шартномаси ва унга тегишли ҳужжатлар тўлиқ тақдим этилган ҳолда техникалар бир иш кўни давомида лизингга расмийлаштирилиб берилади.

Манзил: Тошкент шаҳри, Мустақиллик майдони, 5-уй.

Маълумот учун телефонлар: +99871 239-46-25; 239-43-24; 239-43-65.

Махсулотлар сертификатланган.

Хизматлар лицензияланган.

РЕКЛАМА ЎРНИДА

«EL E'ZUZ MEBEL»: ЭЛГА МАНЗУР МЕБЕЛЛАР

Мамлакатимизда бошқа соҳалар қаторида меболазлик саноати ҳам жадал ривожланиб борапти. Пойтахтимиздаги «El e'zuz mebel» масъулияти чекланган жамияти фаолияти бунга яққол мисол бўлиши мумкин. Корхона ҳудудига киришингиз билан озодаликни кўриб, кўзингиз қувнайди. Жамият Бош директорининг ўринбосари Олимжон Исроилов корхона цехларидаги иш жараёни билан танишишга таклиф қилди.



— Корхонамизда асосан ўта қаттиқ тахталардан, яъни ёнғок, қайрағоч, шунингдек, Россиядан келтирилган бук ёғоч материалдан турли мебеллар ишлаб чиқарилмоқда, — дейди Олимжон. — Бошқа соҳаларда бўлгани каби меболаз саноатида ҳам рақобат жуда кучли. Шу боис жамиятимиз таъсисчи-

си бошчилигида аввал Италиядан, кейинчалик Чехия ҳамда Хитойдан замонавий русумли, лазерли, компьютерлаштирилган дастгоҳларни олиб келиб ўрнатдик. Бу махсулотларимиз сифати ҳамда ишлаб чиқариш қувватини ошириш имконини берди.

Корхонадаги тайёрлов, фрезер-шакл бериш, йиғув, пардозлаш ва мато уриш цехларида мураккаб асбоб-ускуналарни бошқариб, хорижикидан асло қўлишмайдиган мебеллар тайёрлаётган йигит-қизларни кўриб, тўғриси, қувондик.

Корхона жамоаси «Ўзимизда — Ўзбекистонда тайёрланган махсулот хорижикидан кам бўлмаслиги керак!», деган шиор билан ишлайпти.



— Биз дастлаб 1989 йилда пойтахтимизнинг Ҳазрати Имом (Ҳасимом) даҳасида кичик бир цехда тўрт нафар ишчи-мутахассис билан мебел ишлаб чиқаришни йўлга қўйган эдик, — дейди жамият таъсисчиси, тажрибали тadbиркор Абдулгани Қосимов. — Кейинчалик, яъни Муста-

қиллик шарофати билан йўлимиз очилди. 1995 йилда бизга Тошкент шаҳар ҳокимлиги томонидан фаолияти-мизни янада кенгайтириш мақсадида Олмазор туманида 1,6 гектар ер майдони ажратиб берилди. Шундан сўнг ишлаб чиқариш цехларини, маъмурий бино ҳамда тўрт

қаватли мебел савдо салонини ишга туширдик. Цехларга замонавий русумдаги асбоб-ускуналарни ўрнатдик. Бугунги кунда корхонамизда 120 нафардан зиёд ўз ишининг усталари, мутахассислари меҳнат қилмоқда. Шинамгина ошхонамизда ишчи-хизматчиларга бир ма-

ҳал овқат бепул берилади. Ойлик маош ҳам чакки эмас. 2016 йил март ойидан бошлаб «Komodo» exclusive бренди остида 60 турдан ортиқ ҳар хил русумдаги пишиқ, пухта, мустаҳкам ва энг асосийси, сифатли мебеллар ишлаб чиқармоқдамиз.

Яна бир янгилик. Корхона раҳбарияти 2010 йилда жамият даромади эвазига аҳолига сервис хизмати кўрсатиш мақсадида Урганч шаҳрида 2 қаватли, 48 ўринли замонавий меҳмонхонани фойдаланишга топширди. Шунингдек, ичимлик сувини турли сифимдаги полиетилен идишларга қадоқлайдиган цех ҳам ишга туширилди. Бунинг натижасида 8 нафар маҳаллий ёш иш билан банд этилди.

«El e'zuz mebel» масъулияти чекланган жамияти республикада, қолаверса, Мустақил Давлатлар Ҳамдўстлиги мамлакатларида ташкил этилаётган турли кўрик-танловларда муносиб иштирок этиб келмоқда. Жумладан, 2009 йили «Ташаббус» республика кўрик-танловида «Энг яхши экспорт қилувчи ташкилот», 2011 йилда эса «Ешларга иш берган энг

яхши тadbиркор», 2016 йил март ойида Тошкентда ўтказилган Халқаро мебел кўргазмасида «Энг яхши мебел ишлаб чиқарувчи корхона» номинацияларида ғолиб, деб эътироф этилди. Бундан ташқари, 2009-2010 йилларда Қозоғистонда бўлиб ўтган Халқаро мебел кўргазмасида корхона махсулотлари «Энг яхши сифатли махсулот» номинациясида ҳам муваффақият қозонди.

Ҳозирги пайтда жамиятда тайёрланаётган мебелларнинг 30 фоиздан зиёди Қозоғистонга экспорт қилинмоқда. Яқин кунларда махсулотларни Россияга экспорт қилиш мўлжалланган.

Хуллас, «El e'zuz mebel» масъулияти чекланган жамиятининг аҳил жамоаси халқимизга, қолаверса, миждолари ва ҳамкорларига манзур бўладиган мустаҳкам, чиройли ҳамда сифатли мебеллар ишлаб чиқаришдан мамнун. Тез орада «Komodo» exclusive бренди остидаги мебеллар сифати ва турлари янада ошишига ишонамиз.

Мирбaxтиёр МИРФАЙЗИЕВ,
«Ўзбекистон овози» муҳбири.



MUASSIS:

Bosh muharrir: Safar OSTONOV

TAHRIR HAY'ATI:

Abdulla ORIPOV

Saidkamol

Saidahmad RAHIMOV

Hotamjon KETMONOV

XODJAYEV

Farrux HAMROYEV

Ulug'bek VAFOYEV

Muslihiddin

(Bosh muharrir birinchi o'rinbosari)

Rustam KAMILOV

MUHIDDINOV

Tat'yana KISTANOVA

Ochilboy RAMATOV

(Bosh muharrir o'rinbosari)

Qabulxona — 233-65-45

Xatlar va murojaatlar uchun — 233-12-56

E-mail: info@uzbekistonovozi.uz

MANZILIMIZ:

100000, Toshkent, Matbuotchilar ko'chasi, 32-uy.

Gazeta O'zbekiston Matbuot va axborot agentligida 0006-raqam bilan 2007-yil 11-yanvarda ro'yxatga olingan.

«Sharq» nashriyot-matbaa aksiyadorlik kompaniyasi bosmaxonasida chop etildi.

Korxona manzili: Buyuk Turon ko'chasi, 41-uy.

Gazeta ofset usulida, A-2 formatida bosildi. Hajmi — 2 bosma taboq.

Gazeta seshanba, payshanba va shanba kunlari chiqadi.

«O'zbekiston ovozi» materiallarini ko'chirib bosish faqat tahririyat ruxsati bilan amalga oshiriladi.

Г — 1059

9018

nuxxada

bosildi.

Nashr ko'rsatkichi — 220

t — Tijorat materiallari

O'zA yakuni — 20:58

Topshirilgan vaqti — 21:10

Sotuvda kelishilgan narxdo

Navbatchi:

Mirbaxtiyor MIRFAYZIYEV

Sahifalovchi-dasturchilar:

Zafar BAKIROV

Behzod ABDUNAZAROV

ISSN 2030-7633

7720307633006

1 2 3 4 5 6



O'ZBEKISTON
XALQ DEMOKRATIK
PARTIYASI
MARKAZIY KENGASHI

Махсулотлар сертификатланган.